

Zeitschrift: Annalas da la Societad Retorumantscha
Herausgeber: Societad Retorumantscha
Band: 80 (1967)

Artikel: 600 ans Lia da la Chadè : 1367-1967
Autor: Schmid, Töna
DOI: <https://doi.org/10.5169/seals-227956>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 22.08.2025

ETH-Bibliothek Zürich, E-Periodica, <https://www.e-periodica.ch>

600 ans Lia da la Chadè

1367—1967

Töna Schmid

Il temp tanter 1300 e 1400 vain cun dret resguardà sco ün'epoca decisiva illa transiziun tanter il vegl stadi feudal dal Temp d'immez e sia successiun da differenta fuorma e concepziun legala. Quai vala eir per la Republica da las Trais Lias in Rezia, chi cun l'an 1367 nascha our dal chaos da relaziuns specialas e dvainta in seguit pass per pass ün stadi independent, aint il qual la Lia da la Chadè ais statta la prüma e ha mantgnü eir in seguit seis privilegis tanter las traissours alliadas.

Cun la deruotta dal stadi centralisà sco ch'el eira gnü s-chaffi dal temp da Carl il Grand ed avaiva chattà üna cuntuaziun i'l grand Imperi roman da naziun germanica as dà per las singulas contradas chi faivan part a quel üna *differentia possibilità da reglar lur pusiziun da dret*: Obain cha las anteriuras signurias suottamissas gnivan dad ün sulet potentat unidas ad ün stadi autonom — o cha las corporaziuns dals sudets as chattaivan da lur vart insembel ad üna lia d'agüd vicendaivel per far frunt a las tendenzas monarchicas da lur vaschins. La prüma situaziun as ha datta bod dapertuot giò la planüra, ingio ün vast spazi geografic favurisaiva la creaziun d'üna nouva *pussanza centrala*. La via opposta sun its daspö l'an 1240 ils abitants da las Forestas cun lur volontà da restar suottamiss directamaing a l'imperi, quai chi ha fat nascher cun l'ir dals ans lur *Lia da 1291*. Intant cha in noss pajais vaschins cun pudair da suveranità la suottamischiu medievala as ha mantgnüda aint ils nouvs stadis regnats d'ün prinzi amo per seculs a la lunga, as po tant illa Confederaziun con in Rezia perseguitar il svilup successiv dals su-

gets d'üna jada a libers vaschins in sen da defaisa per lur drets acquistats.¹

Sco pro'l Confederats ais alura eir illa veglia Rezia na forsa la voluntà dal pövel quella chi decida da prüm innan. Eir quia as fa valair per ün tschert temp il princip dinastic chi imprometta p. ex. als *baruns da Vaz* da laschar crear ün *stadi absolut* per tuot las valladas grischunas. Lur plan nun ais per furtüna gnü realisà, impustüt grazcha a la vigilanza dad oters signuors chi adascus sömgiaivan eir da gloria e pussanza ed as mettaivan al mumaint decisiv da la vart dal pövel per impedir las intenziuns dals da Vaz. Cun la mort da l'ultim our da quaista schlatta, Donat da Vaz, e l'extincziun da sia dinastia eira quel privel levà. Percunter restaiva amo adüna sco plü ferma pussanza in Rezia il pudair secular da la baselgia, rapreschen-tà tras il *prinzi ovais-ch da Cuoira* chi davo l'introducziun da la constituziun carolingia dal cuntadis avaiva laschà schmützchar l'ulti-ma occasiun per s'chaffir ün stadi autonom in tuot il pajais. In seis rapport cul ovais-ch da Cuoira ha il pövel grischun l'an 1367 per la prüma jada demuossà la voluntà da tour el las mastrinas in man per decider da sia sort, quai chi metta in evidenza l'importanza dal mumaint per l'istorgia grischuna dals seculs chi sieuan.

Cun s-chaffir l'an 806 la nouva constituziun dals cuntadis han ils rais francs miss üna fin al vegl stadi da baselgia retic, regnà per tschientineras dad ans dals recturs o präses Victorids a Cuoira. In seis lö as mantegna però, almain cun pudair e competenzas restret-tas, l'autorità da la baselgia sur d'üna part da l'antierur territori regnà dad ella. Da la veglia Rezia prüma chi tendschaiva nan dal temp roman dals lais Rivan (Walenstadt = waelsche Stadt) e da Constanza fin giò Meran, a la sboccadüra da l'aua da Passiria aint il Adisch, vegnan uschè distachadas las parts vers mezzanot da l'odiern cunfin grischun, hoz incorporadas al chantun da San Galla, sco tuot la part orientala davent da Punt ota, cull'Engiadina bassa, Danuder e Val da l'En superiura in Tirol, Val Müstair e Val da l'Adisch chi fuorman da qua inavant il *cuntadi dal Vnuost* culs du-cas da Baviera sco prüms rapresentants da l'imperatur. Schabain cha in fats da baselgia eir quaista contrada ha continuà a far part

¹ Vair Pieth, Istorgia grischuna, pag. 35 e seg.

da l'ovais-chia da Cuoira fin al 1805, ais il pajais gnü regnà da qua inavant da prinzis esters, tant cha per glivrar, la granda part da quaist territori anteriuromaiing retic ais ida a perder al Grischun.

Ma la *pusiziun da l'ovais-ch da Cuoira* nun eira cun quai in sia chapitala ed otras valladas istess brich sdralossada. Grazcha a la bainvuglientscha da Carl il Grand e seis successuors germanais our da las schlattas dals Ottos e Stauffers ais il possess da la baselgia in seguit gnü augmentà canticadamaing tras privilegis e donaziuns, tant cha intuorn il 1300 arriva'l a la culminaziun da sia pussanza mondana. Uschè regala l'imperatur Otto I. a seis ami, l'ovais-ch Hartpert (947-970), las entradas imperialas a Cuoira e contuorns, conceda ad el il dret da dazi e da marchà, da vias e punts, insemlbel cun üna cuort a Zizers e la pes-cha sül Lai Rivan. L'an 958 vain accordada a l'ovais-ch üna granda part da la cità da Cuoira cun las baselgias da San Martin, San Lureng e San Hilarius ed üna chapella a Termin, sco eir il dret da batter munaida. Pacs ans davo vaina stipulà ün contrat da barat tanter l'ovais-ch e l'imperatur, a norma dal qual, cunter cessiun da bains situats in Germania, il possess da l'ovais-ch vain augmentà da la granda cuort imperiala a Cuoira cun champs e prada, vignas ed alps, vasts gods e pas-chüra, drets d'aua e da pes-cha. Grazcha a quaist barat dvainta l'ovais-ch eir patrun da l'intera Bergiaglia, munida dal plainpudair da cunt imperial e da las entradas dal dazi da Vihsavraun fin a Castasegna, plünavant las baselgias da Panaduz, Razén, Pitasch e Riein, dal dret da pes-cha illa Seez e. u. i. Sco donaziun pervegnan i'ls ans 966 e 967 a l'ovais-ch Hartpert il dazi a la Landquart, la cuort imperiala da Sursaissa culla baselgia dal lö e sias deschmas, diversas vignas a Malans e Termin, bains in Engiadina ota e Vnuost. Oters augmants da possess sieuan da 1122 inavant tras regals dals imperatuors e cumprita da bains e glieud fin alura in man dals signuors da Gämertingen in Engiadina ota e dals da Tarasp in Engiadina bassa, Paznaun, Vnuost e Surset. Tras testamaint dad Ulrich IV. da Tarasp va via sia part dal chastè, munida da richas entradas in divers cumüns vaschins, a la baselgia. Dürant il 13avel secul vegnan pro ils chastels dad Ardez, Tschanüff, Wiesberg (sper Landeck), sco eir il chastè culla cuort da Wildenberg e diversas famiglias a Zernez. Quant inavant cha'ls imperatuors germanais tgnaiwan adaquint il sustegn dals ovais-chs da Cuoira sco chüraduors dals pass da muntagna vers

l'Italia, demuossa la favur accordada ad els l'an 1170 tras Friedrich Barbarossa, in als dand il titel da *prinzis imperials*.

Quaist pudair da l'ovais-chia as disfrenziaiva dimena in agen possess ed incombenzas surdattas ad ella tras ils imperatuors. Una da quellas eira la dignità da cunt imperial cun l'intera giurisdicziun sur d'üna contrada, intant cha in otras valladas l'ovais-ch pudaiva exercitar be la giurisdicziun bassa vers ils agens da la baselgia a norma dal dret d'immunità. Quaist'ultima favur da granda portada al eira gnüda accordada l'an 831 dal figl da Carl il Grand, l'imperatur Ludwig il Pietus e gnit approvada 150 ans plü tard (988) tras Otto III.

In che detags consistiva il privilegi d'immunità da quel temp? Eir scha la noziun ha subi in seguit diversas interpretaziuns, tant cha svess ils istorikers nu san da's unir quant inavant ch'ella tendschaiva, as po cun tschertezza cunstatar, cha da prüm innan *il possess da glieud e bains* eira la condiziun per admetter a baselgias e clostras l'immunità. Tras ella eiran na be massers agens sün bains da la baselgia, ma eir ils differents libers chi cultivaivan sco fittadins quel terrain, emancipats dal prüm dret dal cunt: quel da güdichar in dumandas na criminalas sur dad els. L'immunità da l'ovais-ch nu consitiva però be in affars güdizials. Uschè eiran ils servs e fittadins da la baselgia e da las clostras exempts da tuottas gabellas inchaschadas utrò dal cunt e seis ufficiants e liberats da qualsia dovair invers inchün oter co l'imperatur. Ingüns funczianaris dal cunt nu pudaivan metter pè sün terrain da la baselgia o perseguitar in chasa inchün chi per alch motiv pigliaiva refugi aint il revier immunisà². Plünavant nu das-chaivan ingüns ufficiants o suottamiss al cunt sün viadis da muntagna far pretaisa d'allogi per els e lur seguit suot il tet muni dal dret d'immunità. Dals paurs suottamiss a l'ovais-ch o a las clostras nu pudaiva gnir pretais, ch'els mettan a disposiziun ün armaint da brüdagl, cur cha'l signuors in cas da guerra passaivan cun interas chargias da bagagl e victualias d'üna vallada a l'otra. Be in cas cha l'imperatur svess e sia glieud dumandaivan lur servezzan, eiran els intgnüts da tgnair avert lur chasas e sieuer cun manadüra e man armà.

² Paul Valèr: Die Entwicklung der hohen Gerichtsbarkeit und die Ausbildung der Landeshoheit im Unterengadin, pag. 15 e seg.

Al mumaint per nus important, v. d. vers 1350, eiran il possess ed ils drets da l'ovais-ch da Cuoira ourdvart vasts, saja a norma da sia facultà in terrain cun il dret d'immunità vers l'aigna glieud sparsa tanter sugets esters, sco eir in sia dignità da prinzi imperial cul pudair cumplet da cunt in diversas valladas chi appartgnaivan ad el.

Be cha'ls ovais-chs füssan alura eir stats adüna buns administraduors da lur pajais e glieud! Malavita nun ais quai pro divers dad els brichafat stat il cas, e per quel motiv sun suvent naschüdas cuntasas cun vaschins chi profitaivan da lur deblezza per schlargiar l'aigna pussanza. Quai vala impustüt in lur rapport culs *cunts dal Tirol* chi cun l'ir dal temp sun dvantats dignitaris dal cuntadi dal Vnuost. Our d'üna pusizun subalterna, illa quala els t. o. eiran stats eir vasals da l'ovais-ch, als reuschischa quai plan a plan da's far independents e crear ün agen possess privat a cuost da lur patruns da plü bod, chi surpassa la forza da quels. In quel möd pactescha p. ex. il cunt Adalbert III. culs baruns da Reichenberg, ufficiants da l'ovais-ch in Vnuost, per trar a sai cunter tuot dret l'inter chastè da Tarasp, possessiun fin alura per part da la baselgia. Seis succesor e dschender Meinhard I. da Görz-Tirol permetta dal 1256 a Nannes da Ramosch da construir ün nouv chastè, la fortezza da Tschanüff, cun l'oblig da la tgnair adüna averta ad el, dimena sco feudo tirolais als da Ramosch³. Cha quaists eiran a listess temp vasals da l'ovais-ch, zuos-cha ladramainta e tradituors da lur patron, ais plü tard gnü cumprovà cleramaing davo la fin schlaschada da lur stirpa, tras l'ovais-ch Hartmann da Werdenberg-Sargans davant güdisch⁴. Tschanüff eira gnü fabrichà sün terrain da l'ovais-chia ed appartgnaiva ad ella, e na als Tirolais. In quel möd ais i a perder per Cuoira il chastè da Wiesberg, a l'entrada dal Paznaun, ed aisa repetidamaing gnü fat la prova da metter il man eir sün la Fürstenburg in Vnuost, il plü important pilaster da defaisa per l'ovais-ch in quella contrada. Tanter sugets e fittadins dal cunt e d'oters signuors vivaivan nempe illa part sura da la Val da l'Adisch in bod mincha cumün e suuent dafatta suot listess tet famiglias da

³ Vair Th. de Mohr, Codex dipl. I., pag. 344

⁴ Vair Egger, Geschichte Tirols pag. 444 e Mayer, Gesch. des Bistums Chur I., pag. 496

la Chasa da Dieu o da las clostras da Müstair e dal Munt Sta. Maria, sper Barbusch, chi suotstaivan a l'immunità da l'ovais-ch, instant cha be daspera ils sugets tirolais pigliaivan adüna daplü il suraman. Là sco in Engiadina bassa dvantaiva la pusiziun da la baselgia dad an in an plü desastrusa, causa cha'ls interess dals differents patruns as cruschaivan e daivan per conseguenza occasiun a dispitas tanter libers ed agens chi appartgnaivan a la baselgia ed a las clostras obain eiran sugets tirolais. Da quel temp datescha eir l'installaziun d'ün prefect dal cunt sül chaste da Danuder, chi cun l'assistenza d'ün podestà (iudex, officialis) fa pretaisa da l'intera giurisdicziun in Engiadina bassa fin a Punt ota.⁵

Ovais-ch da Cuoira eira daspö 1355 *Petrus I.*, cuntschaint daspö suot il nom «Peter da Boemia».⁶ El derivaiva da Presnowec, in vicinanza da Leitomysl, ill'odierna Tschecho-Slovakia, e sortiva d'üna famiglia da paurs, ils Jelyto obain Gelyto chi vivaivan in relaziuns modestas. Nat l'an 1330, avet el cun grandas privaziuns da's far svess üna via per il stüdi ch'el absolvèt il prüm in sia patria ed alura in Ungaria. El discurriva tuottas duos linguas a perfecziun ed univa eir in seis caracter sang slav cun qualitats magyaras. A las universitats da Bologna, Perugia e Roma stübget el in seguit impustüt il dret ed as acquistet cun grand success il doctorat in giurisprudenza. Davo esser stat prob. per alch temp chancelier ed intendant dal duca Albrecht d'Austria⁷ gnit el grazcha a sias capacitatins insolitas cuort davo ingaschà dal papa Innocenz VI. a far part da la curia papala. Quaista nominaziun al avrit la porta da hierarchia, tant cha bainbod il chattaina sco prevost da Castroferro, illa diocesa da Raab, in Ungaria.

In quel an (1355) eira mort a Cuoira l'ovais-ch Ulrich V. (da la schlatta Ribi, nomnà eir «da Lenzburg») Sco seis successur gnit nomnà dal papa, sainza salüdar il Chapitel da la cuort chi füss stat in dret da pisserar el la tscherna e la laschar approvrar a Roma, il giuven favorit Peter Gelyto, racumandà sainza dubi eir da la cuort da Vienna. Cun seis 25 ans aisa inclegiantaivel, cha quaista nominaziun in üna diocesa tuottafat estra ad el directamaing tras il papa

⁵ Thommen, Urkunden zur Schweizer Geschichte I, pag. 277

⁶ Mayer, Geschichte des Bistums Chur I, pag. 364 e seg.

⁷ Ladurner, Die Vögte von Matsch I, pag. 477

nun al eira tuottafat agredida, quai chi il stimulescha da nomnar sia mischiun «provisio a Sede Apostolica de dicta Curiensi ecclesia nobis facta».⁸ El para intant al cumanzamaint dad avair fat seis pussibel da gnir a cugnuoscher glieud e pövel da si'ovais-chia. Bainbod ha el però da sai oura da tour decisiuns importantas in quai chi reguarda la pusiziun spinusa in Vnuost, illas qualas l'avis da seis cusgliaders il plü dastrusch nun al para sufficiaint. El as volva utrò per cussagl, e quel al vain dat be massa gugent da seis vegls patrums, ils ducas d'Austria, chi per intant sun amo be indirectamaing interessats vi dal conflict tanter Cuira ed ils cunts dal Tirol. Da qua inavant as sviluppa però l'amicizcha ed a listess temp la dependenza da l'ovais-ch Peter da la chasa d'Austria ad ün grà inquietant per seis sugets grischuns. El resainta quai, nun ais però in cas da's far plü liber dals impegnis chi il lian culla cuort da Vienna e va in mincha occasiun ün pass plü inavant in sia suottamischiu als prinzis.

Fingià als 21 marz 1358 conclüda el a *Ratbrechtswiler* cul archiduca Rudolf, seis bap Albrecht ed ils frars da quel üna lia, illa quala l'ovais-ch imprometta cun güramaint da gnir in agüid als ducas cunter qualsia inimi, a l'excepziun dal papa a Roma o il cunt Ludwig da Tirol. Davart da l'Austria al vaina dat l'impromischiun da gnir defais insembel a sia glieud e si'ovais-chia in tuot ils drets e libertats chi al protoccan.⁹

Bler plü inavant va alura il *nouv contrat* cha l'ovais-ch Peter stipulescha als 25 lügl 1360 cun l'archiduca Rudolf e seis frars Albrecht e Leopold. A norma da quel *surdà el l'intera ovais-chia cun tuot las fortezzas, pövel e glieud, drettüras etc.* per la dürada dad ot ans a la chasa Habsburg, exceptuà la Fürstenburg in Vnuost cun quai chi appartegna pro. Ils ducas as impegnan da lur vart d'as-gürar a l'ovais-ch libra dmura a la cuort da Vienna, implü da metter a sia disposiziuns 12 chavagls da sella e da'l pajar üna renta da 1000 gulдинers l'an. Els nu das-chan far guerra per l'ovais-chia oter co cun seis cumentimaint, e scha l'ovais-ch avess dad esser per cas absaint in quel mumaint, ston els laschar decider quai da seis rappresentants tschernüts ouravant, chi as compuonan da trais ca-

⁸ Mohr, Codex dipl. II, pag. 425

⁹ L'original da quaist contrat ais mantgnü aint il Museum germanic a Nürnberg

nonics da la catedrala da Cuoir, trais vaschins da la cità e trais delegats da la Cumöna Chasa da Dieu. Dans chaschunats d'üna tala guerra giaivan a cuost dal prinzi da la baselgia. In cas d'ün'attacha cunter l'ovais-chia, ingio ils ducas gnivan in agüd a quella, avava ün güdisch compromissarial da decider quant a las pretaisas dals protectuors per il servezzan praistà. Bains recuperats tras ils ducas van inavo a la baselgia, han però da gnir bunifichats in munaida. Id als sta liber da schlubgiar pegns scrodats da l'ovais-ch, ma adüna cun l'oblig da surdar a quel davo scuors ils ot ans la somma equivalenta. Per il cas da mort o resignaziun da l'actual ovais-ch dess quaist contrat esser sainza conseguenzas a dischavantach da seis successur.¹⁰

Fingià avant cha'ls ducas d'Austria dvaintan patruns eir dal Tirol as eira cun quai l'ovais-ch Peter our d'aigna volontà suottamiss ad els e vivaiva eir la gronda part da l'an a la cuort da Vienna. Sia vita da signur dumandaiva ils mezs bsögnus per cuernar las spaisas, e quels eiran avant il contrat cull'Austria be dad avair cun impraists in impegnand bains e drets da la baselgia. In quel möd eira tanter 1357 e 1360 il debit da l'ovais-ch creschü eir vers oters credaders a sommas fin alura insolitas.

Qua moura als 17 settember 1361 il cunt Ludwig da Tirol (da la dinastia Brandenburg), e duos ans plü tard, als 13 schner 1363, als sieua eir seis unic figl Meinhard a l'età da 20 ans in fossa. In quaista situaziun as vezza la guaivda Margareta, nomnada per alch motiv «Maultasch», stimulada da renunzchar a seis drets da contessa in Vnuost. Cun contrat dals 26 schner 1363 ceda ella dignità e possess a seis plü struschs paraunts, ils ducas Rudolf, Albrecht e Leopold d'Austria.

Da quaist mumaint davent ais l'Austria la prosmma vaschina da l'ovais-chia da Cuoir, ed ils sugets da quella cumainzan a güzzar las uraglias. Els cugnuoschan be massa bain las tendenzas d'expansiu da la chasa Habsburg e vezzan cun nosch ögl, cha lur patrun, l'ovais-ch pactescha cun quella avertamaing ed as trategna la gronda part da l'an a la cuort da Vienna. Perquai provan seis prossems cusgliaders our dal Chapitel da la catedrala da'l manar sün otra via,

¹⁰ Thommen, Urkunden zur Schweizer Geschichte I, pag. 415 e seg.

ma sainza success. Anzi, cun data dals 10 mai 1364 surdà el da sai oura al duca Rudolf eir amo il chastè da Fürstenburg, e cur cha quel moura l'an seguaint, piglia el inavo il pegrn a la cundiziun, cha d'ur'invia la fortezza haja dad esser averta als Austriacs tant da di sco da not. Oters motivs da pisser per ils da Cuoira as preschainitan cun il cuntgnair dals ufficiants da l'ovais-chia in Vnuost, chi han savurà la puolvra quant a lur agen interess o chi temman egual-maing l'imnatscha nan da l'Austria. Perquai tuot la racaglia dad anteriuers chavaliers e vasals da l'ovais-ch in quella cuntrada festinan da's metter da la vart dal ferm ed as suottametter ad el: ils da Reichenberg, da Matsch, da Schlandersberg, Annenberg e tants oters. Cha eir las duos clostras dal Munt Sta. Maria e Müstair ston per glicherar ceder a la forza e dumandar per alch temp la protecziun da l'Austria in fuorma da chastlania, nun ais in quaist möd da's schmü-ravagliar.

L'inquietezza ed a listess temp malcuntantezza da seis sudits stimuleschan instant l'ovais-ch Peter da convocar «in interess da la Chasa da Dieu», *prob. i'ls prüms dis da l'an 1367*, üna delegaziun dals ministerials, funcziunaris e rapresentants dal Chapitel da la catedrala sco da las valladas *a Zernez*, per as exprimer quant a lur almantanzas e chattar scha pussibel üna via i'l böñ da tuot il pajais. In quaist'occasiun confessan ils partecipants in seguit¹¹ dad avair «rovà instantamaing a lur benign signur ovais-ch Peter, ch'el vegna a star danöv in si'ovais-chia, ingio cun agüid da Dieu els avessan eir plü bod pudü s-chivir insembel tuot ils dans e privels occasiunats tras si'absenza». In realtà nun aisa da presumer, cha quaista supplicha saja gnüda preschentada in möd uschè bandus, ma cha'l's delegats preschaints hajan dit cleramaing quai ch'els pensaivan, rischand dafatta da gnir cun pretaisas precisas vers lur patrun. L'esit da l'inscunter a Zernez ais però stat negativ. L'ovais-ch ha refüsà dad aderir a lur giavüschs ed ais sainza turnar a Cuoira directamaing darcheu parti per Fürstenburg. In quaista situaziun as radunan ils rapresentants da l'ovais-chia danöv als 29 schnere da listess an sulla Cuort a Cuoira e stipuleschan davo madüra ponderaziun ils puonchs chi sun cuntgnüts aint il contrat per la «Cumöna Chasa

¹¹ Cuntgnü da la charta d'assistenza per la Cumöna chasa da Dieu dals 29 schnere 1367 aint il archiv da l'ovais-ch a Cuoira

da Dieu», cuntschaint daspö sco «Charta da la Lia». Quaist documaint rapreschainta l'act da naschentscha da la futura Lia da la Chadè, chi bainschi pür plan a plan as constituischa sco stadi independent ed arriva tschient ans plü tard ad üna prüma prova da constituziun i'l sen odiern dal pled.

La memorabla radunanza dals 29 schner 1367 sulla Cuort a Cuoira as unischa als seguants puonchs per ün pact d'assistenza vicendaivla:

1. Ingün vicari o administradur da l'ovais-ch nu vain arcugnoschü, fintant cha nos ovais-ch Peter viva ed ais titular da la sopcha da Cuoira, sch'el nun ais tschernü eir da las drettüras da la Chadè.
2. L'ovais-ch o seis vicari nu pon ne vender ne impegnar ingüns bains o glieud da l'ovais-chia sainza dumandar il cunsentimaint da la Chadè.
3. Decisiuns quant a dumandas d'importanza per l'ovais-chia pon gnir tuttas be in as cunvgnind eir cullas drettüras alliedas.
4. Las drettüras (ellas vegnan quia nomnadas «valladas») as impromettan agüd tanter pér cun cussagl, vita e possess, afin cha tuot quaists puonchs vegnan executats.

Da l'ovais-ch Peter as doda da qua inavant pac plü in sia diocesa. Cun data dals 29 settember 1367 nomna el davent da Prag, «per grazcha», sco ch'el metta pais da far resortir, ils trais frars Diethelm (canonic da la catedrala da Cuoira), Friedrich e Donat da Toggenburg *administraduors da l'ovais-chia*.¹² Quaista concessiun ais evidaintamaing fingià üna conseguenza da las decisiuns tuttas als 29 schner a Cuoira e rapreschainta ün dals plü importants success per la Chadè da plü tard. Als 6 gün 1368 ais el da chattar a Mantua ed alch mais plü tard ad Avignon, in Frantscha, ingio al vain impalmada la charta da nominaziun emissa dal papa Urban V. sün racumandaziun da l'imperatur Carl IV. sco ovais-ch da Leitomischen, in Boemia. El ha dimena resignà sco ovais-ch da Cuoira per far utrò carriera illa hierarchia. Als 28 favrer 1372 munta el

¹² Mayer, Geschichte des Bistums Chur I, pag. 372

a la dignità dad archiovais-ch da Magdeburg e dvainta per glivrar l'an 1381 ovais-ch dad Olmütz. Qua moura el als 13 favrer 1387 ill'età da 57 ans. Seis successur sulla sopcha d'ovais-ch da Cuoira vain als 20 november 1368 darcheu tschernü directamaing dal papa sün racumandaziun dals ducas d'Austria: Friedrich II. dad Erdingen, stat chancelier a la cuort a Vienna.

Il documaint dals 29 schnen 1367 rapreschainta dimena la *prüma cunvegna tanter glieud da la Chadè in defaisa da l'independenza grischuna*. El nun ais per intant oter co ün'impromischiun d'assistenza vicendaivla e vain perquai amo da l'istoriker Mohr in seis «*Codex diplomaticus*» nomnà simplamaing «*Contrat e perincletta tanter il Chapitel da la catedrala e tuot la glieud da la Chadè regard alchüns puonchs chi van pro a quella*».¹³ In vardà as tratta però in quaista «*Charta da la Lia*» fingià da stipulaziuns precisas chi sun stattas da därada e han da qua inavant servi a tgnair insembel ils partecipats fin a lur uniun definitiva da plü tard.

Cha ils detagls da quaist'impromischiun vegnan tuts in seri, ha pisserà il temp seguaint. Eir scha üna perincletta cul ovais-ch Peter nun ais stattu pussibla in tuot ils puonchs, savaina cha'l prinzi da la baselgia ha svess amo, «per grazcha» tschernü impè dals ducas d'Austria chi eiran destinats ad occupar quel post, ils trais frars da Toggenburg sco administraduors da l'ovais-chia, dals quals il plü vegl, Diethelm, ais sco canonic da la catedrala sainza dubi ün dals anteriuors cusgliers da l'ovais-ch, stats ignorats da quaist. Cun quai füss la prüma pretaisa dals sudits fingià stattu executada ed il contrat cull'Austria dvantà illusoric. L'ovais-ch nu manzuna expressivamaing quaist fat, bain per la radschun cha in sia dependenza da la chasa Habsburg nu pudaival gnanca far quai. El tira però las consequenzas e resignescha sco ovais-ch da Cuoira, rendand quatras l'inter contrat da 1360, chi eira gnü conclüt per il temp limità ch'el occupaiva quel post, da surplü.

Quia però as muossa, cha la situaziun dal mumaint nun eira stattu l'unic stimul per tour pusiziun davart dals sudits vers la volontà absoluta da l'ovais-ch. Fingià da plü bod eira quel stat dependent da seis *cusgliaders a la Cuort da Cuoira*, e probabelmaing eira

¹³ Contrat dals 29 schnen 1367, in original aint il archiv da l'ovais-ch ed in copia pro Mohr, *Codex diplomaticus I*, pag. 202—205

eir in plüssas situaziuns gönü tadlà l'avis dals ministerials e sugets our da las singulas drettüras. In quel temp as faiva largia *la tendenza da's unir tanter libers ed agens aint ils singuls cumüns*, quai chi p. ex. in Engiadina bassa ha guadagnà a la Chadè bler daplü aderents co ch'ella vairamaing disponiva in possess da terrain e glieud. Las corporaziuns tendaivan da's impatrunir da drets chi da vegl toccaivan a l'imperi, sco l'adöver dad as-ch e pas-ch, da la pes-cha aint ils flüms e lais, la sfrüttaziun dals gods etc., tuot factuors economics importants per ils cumüns chi improvaivan da dvantar autonoms.¹⁴ Our da quaist factur as dà eir la granda importanza attribuida al pövel in l'administrazione dal pajais e l'üsar dret in aigna competenza tras las drettüras da la Chadè, da las quals la Bergiaglia e l'Engiadina ota disponivan fangià dal 1367 dad aigna bachetta e sagè. Quaist svilup, cumanzà fangià lönch avant la cuntaisa cun lur sudits, nun avaivan ils ovais-chs pudü o vuglü padimar, e per quel motiv aisa eir inclegiantaivel, cha la chose ha tut seis cuors eir davo l'inscunter a Zernez e la radunanza a Cuoirà chi han pür realisà quai chi avant eira repetidamaing stat pratichà sün via da perincletta sainza cunvegna o dafatta sainza dret.

Cha'ls ducas d'Austria nun eiran da lur vart *brichafat intenziunats da renunzchar* a lur aspiraziuns quant a la Rezia cumprovan lur ulteriuors sforzs dad avair sulla sopcha d'ovais-ch da Coira ün dals lur o almain ün aderent austriac. E lur bratsch tendschaiva da-löntschi. Sün lur racumandaziun eira Peter l'an 1355 gönü tschernü ovais-ch dal papa Innocenz VI. Da seis successur Urban V. vain darcheu, in violand las cumpetenzas dals canonics a Cuoirà, ün Austriac dozà a la plü ota dignità ecclesiastica in Rezia: Friedrich II dad Erdingen, anteriur funcziunari a la cuort da Vienna, chi fangià l'an 1376 as lascha translocar a Brixen, per far lö a Johann II. dad Ehingen, equalmaing chancelier austriac. Ed eir amo lönch davo cha'l prüm puonch cuntgnü illa charta da la Lia, la tscherna da l'ovais-ch cun approvaziun da la Chadè, ais gönü realisà i'l cas da sedisvacanzas, vaina davart da l'Austria improvà cun intermischiun da seis ambaschadur pro las III Lias, da guadagnar üna majorità dals canonics electuors per ün ovais-ch austriac o almain aderent da

¹⁴ Otto Stoltz, Beiträge zur Geschichte des Unterengadins, 53. rapport annual da la Società istorica-antiquara grischuna 1923, pag. 166

Habsburg. Uschè funcziunescha da 1505—41 Paul Ziegler, da Nördlingen, sco titular da la diocesa, e vain amo dal 1728 tschernü il barun tirolais Josef Benedict von Rost, cun agüd dal parti austriac, ovais-ch da Cuoira. Aderents da l'Austria sun stats eir ils duos ovais-chs Federspiel, da Domat, dals quals il prüm, Ulrich VII., ha sco ultima funcziun da seis decasteri inscenà la vendita da la Val Müstair a l'imperatur Carl VI.¹⁵ L'intermischiun da la Chadè, quella jada ferma avuonda per as far valair in affars politics da seis territori, ha cuntschaintamaing impedi quaista cessiun davo trattativas e protestas illa dürada da na damain da 34 ans. (1762)

Il *svilup da la Chadè* va da 1367 davent cleramaing illa lingia da rimplazzar l'autorità absoluta da l'ovais-ch in dumandas secularas cun üna *collavuraziun tanter patrun e sudits*. Per bod 200 ans ais lapro il Chapitel da la catedrala, v. d. l'ota spiritualità da la diocesa, chi maina quaist movimaint e sustegna l'ovais-ch cun cus-sagl, il rendand a listess temp dependent da seis cugliaders ed agü-dants ingio cha l'administraziun dal pajais dumandaiva quai.

Favuraivels sün quaista lingia sun stats impustüt ils ans, cur cha l'ovais-ch *Hartmann II. (da Werdenberg-Sargans)* regnaiva a Cuoira. (1388—1416). El eira, in contrast cun ils blers da seis anteces-suors, ün dret guerrier, adüna pront da defender ils interess da si' ovais-chia e perquai eir suvent chüz da munaida cur cha as trattaiva da gnir incunter a seis obligs. Per el stan süertà, cur cha Hartmann vain tut praschuner dals Austriacs a l'occasiun da las guerras appenzellaisas: la cità da Cuoira, il Chapitel da la cuort, ils ministerials da la Chadè e las Drettüras da Surset, Bergiaglia, Engiadin' ota, Tumgias-cha, Bravuogn, Avras, Val Müstair e Vnuost.¹⁶ Natü-ralmaing ais el in seguit sforzà da far concessiuns a seis sudits per las spaisas occasiunadas tras el. Causa cha quasi tuot las entradas da l'ovais-chia, insembel cun seis possess eiran impegnats, as decle-ran darcheu la cità da Cuoira, il Chapitel da la cuort e las valladas da la Chadè perinclets da surtour il debit, bainschi a cundiziuns fich düras per l'ovais-ch. Dasper el vain plazzà sül chastè da Marsöl ün chastlan da la Chadè chi maina l'administraziun. A quel sun dats

¹⁵ Anton Largiadèr, La liberaziun da la Val Müstair, 1762, in Annalas 75, 1962

¹⁶ Anton v. Castelmur, Versuch einer Einführung der ständischen Verfassung im Bistum Chur, separat da la Revue d'Histoire ecclésiastique, Fribourg 1924

sco agüdants duos cusgliaders cull'incombenza da pisserar ed executar tuot quai chi pudaiva servir al böñ dal pajais. Unicamaing las entradas our dal üsar dret da la baselgia ed alch fits da feudo van amo directamaing illa chascha da l'ovais-ch. Quaists traís uffizianti chi plü tard tuornan sco margiurdom e chapitanis da la cuort han quatras in man l'intera administraziun seculara da l'ovais-chia. Il contrat da 1409 cul ovais-ch Hartmann ais cun quai ün grand pass inavant vers üna constituziun democratica in Grischun, cun separaziun precisa dal pudair spiritual e mondan da la baselgia.

Nouvas provas da tutelar l'ovais-ch in affars d'administraziun vegnan fattas l'an 1439, 1452 e darcheu suot Ortlieb de Brandis l'an 1468. In quaist'ultima occasiun as muossan a man dal *tractat da Farschno* las pretaisas precisas dals sugets per obtgnair üna cesiun dürabla da tuot l'administraziun in sen da l'evoluziun dal temp. La Chadè ais oramâ consolidada a quel püt, ch'ella as chatta ferma da propuoner ün'autorità därabla cun cumpetenza legislativa per seis territori, cumposta da 24 homens our dal Chapitel da la cuort, da la cità da Cuoira, IV cumüns, Puschlav, dals libers da Laax, Val Müstair e Vnuost. A radschun da quaist artichel füss l'ovais-ch dvantà per adüna dependent da seis Cussagl, vis cha cun validar üna constituziun, si'autorità fin aquà almain formalmaing arcugnoschüda, avess gnü da far plazza a la volontà da las drettüras.¹⁷ L'ovais-ch Ortlieb refüsa perquai dad acceptar quaist proget e chatta incletta pro üna part da seis suottamiss. La cosa vain tratta fin a Roma e glivra cun ün decret dal papa a disfavur dal pövel. Pacs ans plü tard, a l'occasiun dala Guerra svabaisa, sto la Chadè però tuottüna intervgnir, in nomnand per l'ovais-ch mütschà our d'pajais Heinrich v. Höwen ün Cussagl da 3 regents per administrar ils affars da l'ovais-chia: ün canonic, ün rapreschentant da Cuoira ed ün delegà da las otras drettüras. La schliasiun definitiva da la cuntaisa per la forza seculara da l'ovais-ch sieua alura bainbod culla *Charta dals artichels da Glion* da 1526 chi abolischa tuot il pudair mondan dal prinzi da la baselgia.

I'ns resta per glivrar amo dad algordar a l'importanza cha quaista fundaziun da la Lia da la Chadè da l'an 1367 ha gnü *per nos*

¹⁷ A. v. Castelmur, Versuch einer ständischen Verfassung, pag. 104

chantun Grischun dad hoz. Cuntschaintamaing ha il movimaint d' emancipaziun our da la dependenza feudala tut sia via eir in otras parts da la Rezia, stimuland i'ls ans 1395 e 1424 la fundaziun da la *Lia Grischa* in Surselva e pacs ans plü tard, 1436 da quella da las X Drettüras in Partens, Tavo, Belfort e Schanfigg. Per consolidar lur pusiziun vers l'ester as ha bainbod fat valair il bsögn dad unir las forzas. Fingià dal 1406 conclüdan perquai parts da la *Lia Grischa* ün pact d'assistenza culla Chadè, e 1450 as impromettan la Chadè e las Desch Drettüras in listess sen agüid per il cas da bsögn. Il fat da plü granda portada ais alura stat l'uniun da las Trais Lias, chi illa tradiziun dal pövel dess avair gnü lö a Vazerol l'an 1471. In vardà sto quaist fat prob. gnir anticipà per in circa ün decenni, dürant il qual rapresentants da las lias as chattaivan regularmaing insembel in quel lö. Da qua inavant figürescha la Republica da las III Lias in Rezia vers l'exterior sco ün'unità, eir scha i'l intern minchüna dad ellas avaiva mantgnü si'independenza e trattaiva sias fatschendas separadamaing da las otras. Fin al 1798 ais perquai eir la *Lia* da la Chadè restada ün stadi autonom cun seis president da la *Lia* sco parsura e la cità da Cuoira sco chaptala.

Al mumaint da sia fundaziun faivan part ad ella: il Chapitel da la catedrala cun seis rapresentants Rudolf v. Ehrenfels, Eglof, Albrecht e Rudolf da Schauenstein, la cità da Cuoira cun Simon Panigad, La Tumgias-cha e Schons cun Eglof de Juvalta, il Surset cun Conradin de Marmels e Heinrich de Fontana, la Bergiaglia cun seis podestà Ulrich Prevost, Ulrich Minüscher, Jacob de Castelmur, Jacob Schuoler, Hans de Stampa e Hans Salis, l'Engiadina ota cun ils frars Ital, Jacob e Heinrich Planta, l'Engiadina bassa cun il landamma Anselm de Moor e Lutz, da Zernez. Na rapraschentada ais la glieud da la Chadè in Vnuost e sun las drettüras da Val d'Alvra, IV Cumüns e Val Müstair. Da quaistas valladas as distachan plü tard la Val Schons e Valrain per as alliar a la *Lia Grischa* e vain pro il Puschlav. Davo il 1500 as cumponiva perquai la *Lia* da la Chadè dad 11 drettüras grandas cun 17 bachettas güdizialas, da las qualas la cità da Cuoira, il Puschlav ed ils IV Cumüns disponivan daplü co d'üna vusch illa Dieta cumüna da las III Lias:

1. La drettüra granda da Cuoira cun la bachetta da Cuoira
2. La drettüra granda da la Bergiaglia cullas duos bachettas da Sur- e Suot Porta.
3. La drettüra granda da la Tumgias-cha cullas bachettas dad Ortenstein e Farschno
4. La drettüra granda da Surset cullas bachettas da Surset e Chastè.
5. La drettüra granda da Greifenstein cullas bachettas da Vaz sura e Bravuogn.
6. La drettüra granda d'Engiadin'ota cullas bachettas da Sur- e Suot Funtana Merla.
7. La drettüra granda d'Engiadina bassa cullas bachettas (in civil) da Sur- e Suot Tasna.
8. La drettüra granda da Ramosch cullas bachettas da Ramosch, Stalla ed Avras.
9. La drettüra granda da Puschlav culla bachetta unida da Puschlav.
10. La drettüra granda dals IV Cumüns culla bachetta unida dals IV Cumüns.
11. La drettüra granda da Val Müstair culla bachetta unida da la Val Müstair.

Lapro gniva avant la Guerra svabaisa amo la 12avla drettüra granda da Suot Chalavaina cullas duos bachettas da Gluorn e Schlanders, chi però cumpigliaivan, sco in Engiadina bassa, be las famiglias da la Chadè in Vnuost chi suotstaivan a la Lia eir be in affars da giurisdicziun bassa. Intant cha là vegnan davo la deliberaziun da l'Austria, l'an 1652, eir amo pro las duos drettüras in criminal da Sur- e Suot Munt Fallun, ais il Vnuost in conseguenza da las guerras i pers per adüna al Grischun. 1618 crouda cul chastè da Fürstenburg l'intera 12avla drettüra cun ün pêr tschient famiglias da la Chadè in man da l'Austria e 1665 dafatta il quart quartal da la Val Müstair cul cumün da Tuver e sias fracziuns da Puntviglia a Ravera.

La fundaziun da la Lia da la Chadè das-cha in differents regards gnir cuschedrada sco ün mumaint decisiv per il svilup politic da la veglia Rezia ad ün stadi democratic, ingio ils sudits d'üna jada han dat la cumprova da lur madüranza per as regnar svess, independents dals agens signuors sco da l'influenza nan da l'ester. Cha quai ais stat pussibel, laina esser grats a noss antentats in festagiand ingon il 600avel anniversari da quaist evenimaint.